



ქალაქ თბილისის მუნიციპალიტეტის საკრებულო



დადგენილება № 3-17

24 თებერვალი
“ --- ” ----- 2017 ♣

ქ. თბილისი

„ქალაქ თბილისის მუნიციპალიტეტის მერიის საჯარო სამართლის იურიდიული პირის-ცხოველთა მონიტორინგის სააგენტოს მიერ გაწეული ცალკეული მომსახურების საფასურის განსაზღვრის წესის შესახებ“ ქალაქ თბილისის მუნიციპალიტეტის საკრებულოს 2015 წლის 29 დეკემბრის № 33-141 დადგენილებაში ცვლილების შეტანის თაობაზე

„ნორმატიული აქტების შესახებ“ საქართველოს კანონის მე-20 მუხლის მე-4 პუნქტის საფუძველზე, ქალაქ თბილისის მუნიციპალიტეტის საკრებულო ადგენს:

მუხლი 1. „ქალაქ თბილისის მუნიციპალიტეტის მერიის საჯარო სამართლის იურიდიული პირის-ცხოველთა მონიტორინგის სააგენტოს მიერ გაწეული ცალკეული მომსახურების საფასურის განსაზღვრის წესის შესახებ“ ქალაქ თბილისის მუნიციპალიტეტის საკრებულოს 2015 წლის 29 დეკემბრის № 33-141 დადგენილებაში (სსმ, ვებგვერდი: www.matsne.gov.ge, 04/01/2016, სარეგისტრაციო კოდი: 040030000.35.101.016242) შეტანილ იქნეს ცვლილება და დადგენილების პირველი პუნქტით დამტკიცებული წესის:

1. მე-6 მუხლის მე-2 პუნქტის „ა“ ქვეპუნქტი ჩამოყალიბდეს შემდეგი რედაქციით:

„ა) ჩიპირება:

ა.ა) თავშესაფარში - 19 ლარი;

ა.ბ) მისამართზე - 32 ლარი;“.

2. დადგენილებას დაემატოს შემდეგი შინაარსის „ნ¹“ და „ნ²“ მუხლები:

„მუხლი ნ¹. ცხოველების დაჭერა-გაყვანა

1. ცხოველების დაჭერა-გაყვანა ამ წესის მიზნებისთვის გულისხმობს სააგენტოს უფლებამოსილი თანამშრომლების მიერ, სპეციალური აღჭურვილობით და ავტოტრანსპორტით, პირის განცხადებისა და ამ წესით განსაზღვრული საფასურის

გადახდის საფუძველზე განხორციელებულ ქმედებებს, რომლებიც მოიცავს უმეტვალყურეო ცხოველების:

ა) დაჭერას, საქართველოს კანონმდებლობით დადგენილი მეთოდებით;

ბ) გაყვანას ტერიტორიიდან, საქართველოს კანონმდებლობით დადგენილი მეთოდებით;

გ) გაშვებას მიმდებარე, ან სხვა, მიზანშეწონილ ტერიტორიაზე ან საქართველოს კანონმდებლობით გათვალისწინებულ სხვა ღონისძიებებს.

2. დაჭერა-გაყვანას ექვემდებარებიან მხოლოდ ის ცხოველები, რომელთა დაჭერა სცილდება საქართველოს კანონმდებლობით დადგენილ ცხოველთა სავალდებულო დაჭერის საფუძვლებს, მაგრამ მესაკუთრეს არ სურს უმეტვალყურეო ცხოველების ყოფნა მის საკუთრებაში არსებულ ტერიტორიაზე (გარდა ბინათმესაკუთრეთა ამხანაგობების საერთო საკუთრებაში არსებული ტერიტორიისა).

3. სააგენტო არ აგებს პასუხს ამ მუხლის საფუძველზე დაჭერილი და ტერიტორიიდან გაყვანილი ცხოველების იგივე ტერიტორიაზე დაბრუნების შემთხვევაში და მათი გაყვანისთვის გადახდილი საფასური უკან დაბრუნებას არ ექვემდებარება.

4. სააგენტოს მიერ ცხოველების დაჭერა-გაყვანის საფასური განისაზღვრება შემდეგნაირად:

ა) ძაღლის დაჭერა-გაყვანა - 40 ლარი;

ბ) კატის დაჭერა-გაყვანა - 30 ლარი;

გ) მსხვილფეხა პირუტყვის დაჭერა-გაყვანა - 100 ლარი;

დ) წვრილფეხა პირუტყვის დაჭერა-გაყვანა - 60 ლარი.

5. ამ მუხლით განსაზღვრული ცხოველების დაჭერა-გაყვანის საფასური არ ვრცელდება ბინათმესაკუთრეთა ამხანაგობის წევრთა საერთო ქონებიდან დასაჭერ/გასაყვან უმეტვალყურეო ცხოველებზე.

მუხლი 6². რეპელენტით ტერიტორიის დამუშავება

1. რეპელენტით ტერიტორიის დამუშავება ამ წესის მიზნებისთვის გულისხმობს სააგენტოს უფლებამოსილი თანამშრომლების მიერ, სპეციალური აღჭურვილობით და პრეპარატებით, პირის განცხადებისა და ამ წესით განსაზღვრული საფასურის გადახდის საფუძველზე განხორციელებულ ქმედებებს, რომლებიც მოიცავს:

ა) ტერიტორიის, შენობა-ნაგებობების და სათავსოების დათვალიერება-შესწავლას;

ბ) ჩასატარებელი სამუშაოების შინაარსის, სახეობების, მოცულობის და გრაფიკის განსაზღვრას, გეგმის შედგენას და მის შეთანხმებას პირთან;

გ) ქვეწარმავლების საწინააღმდეგო სპეციალური პრეპარატებით, დამაფრთხოებლებით და სხვა ქმედებებით ტერიტორიის, შენობა-ნაგებობების და სათავსოების დამუშავებას;

დ) დამუშავების პროცესში დაფიქსირებული ქვეწარმავლების დაჭერას.

2. დაჭერას ექვემდებარებიან მხოლოდ ის ქვეწარმავლები, რომელთა დაჭერა სცილდება საქართველოს კანონმდებლობით დადგენილ ცხოველთა სავალდებულო დაჭერის საფუძვლებს.

3. ამ მუხლის პირველი პუნქტის „ბ“ ქვეპუნქტით განსაზღვრული გეგმის შედგენის პროცესში, აუცილებელია საქართველოს გარემოსა და ბუნებრივი რესურსების დაცვის სამინისტროს სისტემაში შემავალი საჯარო სამართლის იურიდიული პირის - გარემოს ეროვნული სააგენტოს ჰიდრომეტეოროლოგიური დეპარტამენტისგან (შემდგომში - ჰიდრომეტეოროლოგიური დეპარტამენტი) მიღებული ჰიდრომეტეოროლოგიური პროგნოზის გათვალისწინება.

4. ამ მუხლის პირველი პუნქტის „ბ“ ქვეპუნქტით განსაზღვრული ღონისძიებების შედეგად, დგინდება ჩასატარებელი სამუშაოების შესაბამისი კატეგორია:

ა) „პირველი კატეგორია“, რაც ამ წესის მიზნებისთვის გულისხმობს ქვეწარმავლების საწინააღმდეგო სპეციალური პრეპარატებით, სასხურებელი აპარატის საშუალებით, წერტილოვანი ან ხაზობრივი დასხურების მეთოდით, პრეპარატის შესხურებას წვრილი ჭავლით ან გამაფრქვევლით, დასაცავი ტერიტორიის, შენობა-ნაგებობების და სათავსოების გარშემო, წინასწარ განსაზღვრულ პერიმეტრზე;

ბ) „მეორე კატეგორია“, რაც ამ წესის მიზნებისთვის გულისხმობს ამ მუხლის მე-3 პუნქტის „ა“ ქვეპუნქტით გათვალისწინებული ღონისძიებების ჩატარებას შენობა-ნაგებობებში და მათ სარდაფებში, სხვენებზე, საწყობებში, სხვა, სამეურნეო და დამხმარე დანიშნულების ნაგებობებში;

გ) „მესამე კატეგორია“, რაც ამ წესის მიზნებისთვის გულისხმობს ამ მუხლის მე-3 პუნქტის „ა“ ან/და „ბ“ ქვეპუნქტებით გათვალისწინებული ღონისძიებების ჩატარებამდე, წინასწარ, დასამუშავებელ ტერიტორიაზე ბალახის საფარის დადაბლების, ბუჩქების გაკაფვის, სპეციალური პრეპარატების გამოყენებით სოროების ამოქოლვის ღონისძიებების ჩატარებას, ამ ღონისძიებების შედეგად წარმოქმნილი ნარჩენებისგან (ბალახის, ბუჩქების და სხვა) ტერიტორიის დასუფთავების გარეშე;

დ) „მეოთხე კატეგორია“, რაც ამ წესის მიზნებისთვის გულისხმობს ამ მუხლის მე-3 პუნქტის „გ“ ქვეპუნქტით გათვალისწინებული ღონისძიებების ჩატარებას, ამ ღონისძიებების შედეგად წარმოქმნილი ნარჩენებისგან (ბალახის, ბურქების და სხვა) ტერიტორიის დასუფთავებით.

5. სააგენტო არ აგებს პასუხს ამ მუხლის საფუძველზე გაწეული მომსახურების შედეგებზე, თუ ამ მომსახურების მიწოდების პროცესში ან მომსახურების მიწოდების შემდგომ სამი დღის განმავლობაში შეიცვალა ამ მუხლის მე-2 პუნქტის საფუძველზე დადგენილი ჰიდრომეტეოროლოგიური პროგნოზის პარამეტრები და ტერიტორიაზე ატმოსფერული ნალექის შედეგად შესუსტდა ან სრულად განეიტრალდა ჩატარებული ღონისძიებების ეფექტი.

6. სააგენტოს მიერ, რეპელენტით ტერიტორიის დამუშავების საფასური, სამუშაოების კატეგორიების მიხედვით, ერთი კვადრატული მეტრის ფართობზე განისაზღვრება შემდეგნაირად:

- ა) პირველი კატეგორიის სამუშაოები - 0,5 ლარი;
- ბ) მეორე კატეგორიის სამუშაოები - 1,0 ლარი;
- გ) მესამე კატეგორიის სამუშაოები - 1,5 ლარი;
- დ) მეოთხე კატეგორიის სამუშაოები - 2,0 ლარი.

7. სააგენტოს მიერ ამ მუხლის მიზნებისთვის ქვეწარმავლების დაჭერის საფასური შეადგენს 20 ლარს ერთ დაჭერილ ქვეწარმავალზე.

8. სააგენტოს მიერ, ამ მუხლის მიზნებისთვის „მიმდინარე და სამი მომდევნო დღის ჰიდრომეტეოროლოგიური პროგნოზის“ საფასური დგინდება ჰიდრომეტეოროლოგიური დეპარტამენტის მიერ.

9. სააგენტოს მიერ ერთი პირის საერთო ტერიტორიის რეპელენტით დამუშავების მომსახურების საერთო საფასური შედგება:

ა) საერთო ტერიტორიის სხვადასხვა ნაწილებში სამუშაოების კატეგორიების შესაბამისად შესრულებული ცალკეული სამუშაოების საფასურის ჯამისგან;

ბ) დაჭერილი ქვეწარმავლების რაოდენობის მიხედვით, რეპელენტით დამუშავებულ საერთო ტერიტორიაზე ქვეწარმავლების დაჭერის საფასურისგან;

გ) „მიმდინარე და სამი მომდევნო დღის ჰიდრომეტეოროლოგიური პროგნოზის“ საფასურისგან.“.


3. მე-8 მუხლის მე-3 და მე-4 პუნქტები ჩამოყალიბდეს შემდეგი რედაქციით:

„3. საფასური გადაიხდება წინასწარ, ნაღდი ან უნაღდო ანგარიშსწორებით, შესაბამისი მომსახურების გაწევამდე, გარდა ამ მუხლის მე-4 პუნქტით გათვალისწინებული შემთხვევებისა.

4. ამ წესის მე-5 მუხლით გათვალისწინებული დაყოვნების საფასური, ასევე ტრანსპორტირების პროცესში პირის თხოვნის და მის მიერ დასახელებული ობიექტური გარემოებების საფუძველზე, ტრანსპორტირების მარშრუტის ცვლილების შედეგად გაზრდილი ტრანსპორტირების მანძილის საფასური, 6¹ მუხლის მე-4 პუნქტით გათვალისწინებული საფასური და 6² მუხლის მე-7 პუნქტით გათვალისწინებული საფასური, გადაიხდება შესაბამისი მომსახურების მიწოდების შემდეგ, ნაღდი ან უნაღდო ანგარიშსწორებით, ფაქტობრივად შესრულებული სამუშაოს (დაყოვნების ხანგრძლივობის, გაზრდილი მანძილის ოდენობის, დაჭერილი ცხოველების/ქვეწარმავლების რაოდენობის შესაბამისად) მოცულობის საფუძველზე.“.

მუხლი 2. დადგენილება ამოქმედდეს გამოქვეყნებისთანავე.

საკრებულოს თავმჯდომარე



გიორგი ალიბეგაშვილი

გ ა ნ მ ა რ ტ ე ბ ი თ ი ბ ა რ ა თ ი

„ქალაქ თბილისის მუნიციპალიტეტის მერიის საჯარო სამართლის იურიდიული პირის-ცხოველთა მონიტორინგის სააგენტოს მიერ გაწეული ცალკეული მომსახურების საფასურის განსაზღვრის წესის შესახებ“ ქალაქ თბილისის მუნიციპალიტეტის საკრებულოს 2015 წლის 29 დეკემბრის № 33-141 დადგენილებაში ცვლილების შეტანის თაობაზე“ ქალაქ თბილისის მუნიციპალიტეტის საკრებულოს დადგენილების პროექტზე

ა) ქალაქ თბილისის მუნიციპალიტეტის საკრებულოს დადგენილების პროექტის (შემდგომში - პროექტის) მიღების (გამოცემის) მიზეზი/პროექტის დამახასიათებელი ძირითადი ნიშნები:

1. სსიპ ცხოველთა მონიტორინგის სააგენტოს საქმიანობის სფერო, ძირითადი ამოცანები და კომპეტენცია განისაზღვრება ქალაქ თბილისის მუნიციპალიტეტის საკრებულოს შესაბამისი დადგენილებებით დამტკიცებული:

- სააგენტოს წესდებით (დებულებით);
- „ქ.თბილისის მუნიციპალიტეტის ტერიტორიაზე ცხოველების (ძაღლების, კატების) მოვლა-პატრონობისა და მათი პოპულაციების მართვის წესით“;
- „ქალაქ თბილისის მუნიციპალიტეტის მერიის საჯარო სამართლის იურიდიული პირის-ცხოველთა მონიტორინგის სააგენტოს მიერ გაწეული ცალკეული მომსახურების საფასურის განსაზღვრის წესით“;
- „საქართველოს ადმინისტრაციულ სამართალდარღვევათა კოდექსის“ 103-ე მუხლით, 148-ე მუხლის მე-3 და მე-4 ნაწილებით და 151-ე მუხლის მე-3 ნაწილით გათვალისწინებული სამართალდარღვევისას საჯარიმო ქვითრის - ადმინისტრაციული სამართალდარღვევის ოქმის ფორმის, მისი შევსების, ჩაბარების, წარმოებისა და აღრიცხვა-ანგარიშგების წესით“.

აღნიშნული და სხვა ნორმატიული აქტებით განსაზღვრული უფლებამოსილების ფარგლებში განხორციელებული საქმიანობის შედეგების, ასევე სააგენტოში შემოსული შეტყობინებების ანალიზის საფუძველზე იკვეთება, რომ დადგენილი მომსახურების სახეობებთან ერთად, თბილისის მაცხოვრებლებს, მათ შორის ცხოველთა პატრონებს დამატებით სურთ ისეთი სახის კვალიფიციური მომსახურების მიღება, რომელსაც, ხშირ შემთხვევაში, ვერ უზრუნველყოფენ კერძო სექტორის მეშვეობით, სხვადასხვა მიზეზებიდან გამომდინარე.

ზემოხსენებულ მოთხოვნად სერვისებს შორის აღსანიშნავია:

- კერძო საკუთრებაში არსებულ ტერიტორიაზე შეღწეული უმეთვალყურეო ცხოველების (ძაღლი, კატა, მსხვილფეხა ან/და წვრილფეხა პირუტყვი) დაჭერა, ამ ტერიტორიიდან მათი შემდგომი გაყვანის მიზნით იმ შემთხვევებში, თუ არ იკვეთება კანონმდებლობით დადგენილი ცხოველების სავალდებულო დაჭერის საფუძველები;

- ქვეწარმავლებისგან მომდინარე საფრთხეების პრევენციის ან/და აღკვეთის მიზნით, საკუთარი (ფიზიკური ან/და იურიდიული პირის) ტერიტორიის რეპელენტი (ქვეწარმავლების სპეციალური დამაფრთხობლებით) ტერიტორიის დამუშავება.

გარდა ამისა, დღის წესრიგში დადგა „ქალაქ თბილისის მუნიციპალიტეტის მერიის საჯარო სამართლის იურიდიული პირის - ცხოველთა მონიტორინგის სააგენტოს მიერ გაწეული ცალკეული მომსახურების საფასურის განსაზღვრის წესით“ დადგენილი, საკუთრებაში არსებული ცხოველების ჩიპირების ტარიფის (10 ლარი) გადასინჯვის (გაზრდის) მიზანშეწონილობა, რაც განპირობებულია შემდეგი გარემოებებით:

- სააგენტოს მიერ ჩატარებული, ცხოველების ჩიპირების მომსახურების „ბაზრის“ კვლევის შედეგებით (შესწავლილია 35 ორგანიზაციის პრეისკურანტები და მიკროჩიპების მონაცემები) დადგინდა, რომ აღნიშნული სერვისის ღირებულება თბილისში მერყეობს 20 - 50 ლარის ფარგლებში (20-ლარიანი ტარიფი დაფიქსირდა 7 ორგანიზაციაში, 25-ლარიანი - 18-ში, 30-ლარიანი - 5-ში, 40-ლარიანი - 2-ში, 50-ლარიანი - 3-ში, მიკროჩიპის ხარისხი და მწარმოებელი ქვეყნის მონაცემები სერვისის ღირებულებაზე გავლენას ფაქტობრივად არ ახდენენ), ხოლო საშუალო არითმეტიკული ტარიფი შეადგენს დაახლოებით 28 ლარს;

- 2016 წლის 31 დეკემბრის მონაცემებით, სააგენტოს მიერ წარმოებულ ცხოველთა ერთიან სარეგისტრაციო ბაზაში ფიქსირდება 6286 რეგისტრირებული-იდენტიფიცირებული პატრონიანი ცხოველი, რომელთაგან სააგენტომ განახორციელა 899 ცხოველის რეგისტრაცია (5387 ცხოველი დაარეგისტრირეს სხვა ორგანიზაციებმა, სააგენტოს მიერ დელეგირებული უფლებამოსილების საფუძველზე). ამასთან, სააგენტოს მიერ რეგისტრირებული 899 ცხოველიდან, ფასიანი მომსახურება - „იდენტიფიკაცია ჩიპირებით“ სააგენტომ ჩაატარა 536 შემთხვევაში, რაც შეადგენს საერთო რეგისტრირებული-იდენტიფიცირებული ცხოველების მხოლოდ 8,5 %-ს. ზემოხსენებული კი მიუთითებს იმ გარემოებაზე, რომ სააგენტოს მიერ ჩიპირების ტარიფის ზრდა არ მოახდენს რაიმე მნიშვნელოვან გავლენას (ტარიფის ზრდას) აღნიშნული მომსახურების საერთო, საშუალო ტარიფზე;

- 2016 წლის დასაწყისში სააგენტოს მიერ შემენილი მიკროჩიპების თვითღირებულება შეადგენს დაახლოებით 9,0 ლარს. მოქმედი ნორმატიული აქტით დადგენილი ჩიპირების ტარიფის მინიმალური 10-ლარიანი ოდენობის დაწესება (მოგების გარეშე) მიზნად ისახავდა 2015 წლის 6 აპრილს შემოღებული ახალი სავალდებულო სარეგისტრაციო პროცედურის პოპულარიზაციასა და ხელშეწყობას (მინიმალური ღირებულების თვალსაზრისით), ასევე იმ პერიოდში დედაქალაქში არსებული ცხოველების ჩიპირების მომსახურების უსაფუძვლოდ მაღალი საფასურის (40 – 70 ლარი) ოპტიმიზაციას, ჯანსაღი კონკურენციის გაწევის გზით. მიმდინარე ეტაპზე ცხოველების იდენტიფიკაცია-რეგისტრაციის პროცესის ანალიზი ცხადყოფს, რომ ორივე ზემოხსენებული ამოცანა მიღწეულია - იდენტიფიკაცია-რეგისტრაციის პროცესი სტაბილურად ვითარდება, ხოლო ჩიპირების მომსახურების საფასური მნიშვნელოვნად შემცირდა. შექმნილ ვითარებაში, შესაძლებელი და მიზანშეწონილია სააგენტომ დაიწყოს ზემოხსენებული მომსახურებით შესაბამისი შემოსავლის მიღება.

ყოველივე ზემოხსენებულიდან გამომდინარე, წარმოდგენილია ქალაქ თბილისის მუნიციპალიტეტის საკრებულოს დადგენილების პროექტი „ქალაქ თბილისის მუნიციპალიტეტის მერიის საჯარო სამართლის იურიდიული პირის - ცხოველთა მონიტორინგის სააგენტოს მიერ გაწეული ცალკეული მომსახურების საფასურის განსაზღვრის წესის შესახებ“ ქალაქ თბილისის მუნიციპალიტეტის საკრებულოს 2015 წლის 29 დეკემბრის № 33-141 დადგენილებაში ცვლილების შეტანის თაობაზე“.

ბ) პროექტის საფინანსო-ეკონომიკური გაანგარიშება:

პროექტის მიღება არ გამოიწვევს აუცილებელი (დამატებითი) ხარჯების გამოყოფას ქ.თბილისის მუნიციპალიტეტის ბიუჯეტიდან.

გ) პროექტის ავტორი (ავტორები):

პროექტის ავტორია ქალაქ თბილისის მუნიციპალიტეტის მერიის საჯარო სამართლის იურიდიული პირი - ცხოველთა მონიტორინგის სააგენტო.

დ) პროექტის წარმდგენი:

პროექტის წარმდგენია ქალაქ თბილისის მუნიციპალიტეტის მერი.